

*"We can complain because rose bushes have thorns, or we can rejoice because thorn bushes have roses"*  
**Abraham Lincoln**

### NUWE LEIERSKAP AAN DIE HOOF VAN TRANSNET

Die CGA verwelkom die aanstelling van Michelle Phillips as Groep Uitvoerende Hoof by Transnet. Ons waardeer veral haar uitgebreide ervaring in Transnet, omdat sy deur die maatskappy se geleedere gekom het. Sy het as waarnemende HUB leierskap getoon. Die stabiliteit wat haar voortsetting in die posisie meebring, word ook waardeer. Die CGA hoop dat Transnet onder haar leierskap meer Publiek-Private Vennootskappe sal beywer, soos die noodsaaklike gesamentlike onderneming met *International Container Terminal Services Inc.* (ICTSI) om *Durban Container Terminal Pier 2* te moderniseer en te bestuur. Sy het onlangs waardering getoon vir die enorme bydrae wat varsprodukte-uitvoer tot die Suid-Afrikaanse ekonomie lewer. Met die sitrus-uitvoerseisoen wat in April begin, gaan die bedryf voort om met alle rolspelers te skakel om seker te maak dat die hawens voor dan so doeltreffend moontlik is.

### PRODUSENTE INDABA: HAWENS

Produsente word gevra om hul deelname by die Port Indaba op 8 Maart 2024 by die WNNR in Pretoria te bevestig. Die vergadering word belê om die stand van gereedheid vir die komende seisoen te peil, met belangrike aanbiedings deur Mitchell Brooke (CGA) en Theo Boshoff (Agbiz). Boonop wil die sitrusbedryf by ander sektore leer deur aanbiedings uit die motorsektor en die tafeldruifbedryf.

Die Indaba is beperk tot CGA-lede (sitrusprodusente) en aangesien spasie beperk is, RSVP asseblief teen nie later nie as 5 Maart na [tanya@cga.co.za](mailto:tanya@cga.co.za).

### TWEDE WEEK VAN CGA PRODUSENTE ROADSHOW

Die afgelope week het die A-span – Rob Elfick (RBX), Jacomien de Klerk (Citrus Academy), Sean Moore (CRI), Mitchell Brooke (CGA), Lukhanyo Nkombisa (CGA-GDC), Tevan Lehman (CGA-CC) – en ek, deur sitrusverbouingstreke in die pragtige Oos-Kaap gereis. Die provinsie is 'n kragstasie in die Suider-Afrikaanse sitruskonteks. Weereens was baie jong produsente by die vergaderings teenwoordig (hoewel ek sukkel om aan die naam "Oom" gewoond te raak) en dit wys die bedryf sal in die toekoms in goeie hande wees.

Daar was oor die algemeen 'n positiewe atmosfeer in die Oos-Kaap. Die Patensie-streek het 'n vol dam, terwyl Sondagsrivier en die Oos-Kaapse Middellande albei goeie somerreën gekry het.

Om deur die streek te ry, bring die syfers agter Vision 260 in skerp fokus – daar is soveel onlangse aanplantings wat begin om in produksie te kom, en die gebruik van nete is nou duidelik.

Sitrusprodusente maak die beste gashere, maar kan ook die span op 'n aangename manier op 'n dwaalspoor lei. Baie dinge word om die braaivleisvuur uitgesorteer. Dankie aan Nedbank en Derrick Sissons vir hul borgskap wat die CGA in staat gestel het om te verseker dat die roadshows met 'n paar uitstekende netwerke geëindig het.

Die week is op 'n hoë noot afgesluit toe ons die Hoër Landbouskool Winterberg in Fort Beaufort besoek het om 'n paar tabletrekenaars te oorhandig om leerders te help met die aanvang van die Sitrus Sekondêre Program (met vergunning van die Orange Heart-inisiatief, die CGA se uitreikprogram). Wat 'n plesier vir Jacomien om die skool toe te spreek – en baie geluk aan die skoolhoof en onderwysers wat sulke uitstekende dissipline en maniere by die skool ingeskerp het. Dit is belangrik dat skole in sitrusverbouingstreke met die bedryf saamwerk en dat leerders geleentheid kry om 'n sektor te betree wat op hul voorstoep is.

Die B (Beste Span) het die ver ryery deur die Wes-Kaap (Boland en Citrusdal) en Noord-Kaap (Kakemas) gedoen. Meer oor hul laaste week in die volgende nuusbrieff.